

四庫全書

史部

欽定四庫全書

遼史卷七十二

元中書右丞相總裁托克托等修

列傳第二

宗室

義宗

貝

子平王隆先

晉王道隱

章肅皇帝

魯呼

子宋王喜隱

順宗

濬

晉王額魯溫

義宗名貝小字托雲太祖長子母淳欽皇后舒魯氏幼聰敏好學外寬內摯神冊元年春立為皇太子時太祖問侍臣曰受命之君當事天敬神有大功德者朕祀之何先皆以佛對太祖曰佛非中國教貝曰孔子大聖萬世所尊宜先太祖大悅卽建孔子廟詔皇太子春秋釋奠從征烏爾古党項為先鋒都統及經畧燕地太祖西征留貝守京師因陳取渤海計天顯元年從征渤海拔扶餘城上欲括戶口貝諫曰今始得地而料民民必不

安若乘破竹之勢徑造輝罕城克之必矣太祖從之貝
與大元帥德光為前鋒夜圍輝罕城大譴譔窮蹙請降
尋復叛太祖破之改其國曰東丹名其城曰天福以貝
為人皇王主之仍賜天子冠服建元甘露稱制置左右
大次四相及百官一用漢法歲貢布十五萬端馬千匹
上諭曰此地瀕海非可久居留汝撫治以見朕愛民之
心駕將還貝作歌以獻陞辭太祖曰得汝治東土吾復
何憂貝號泣而出遂如儀坤州未幾諸部多叛大元帥

討平之太祖訃至貝卽日奔赴山陵貝知皇太后意欲
立德光乃謂公卿曰大元帥功德及人神中外攸屬宜
主社稷乃與羣臣請於太后而讓位焉於是大元帥卽
皇帝位是為太宗太宗既立見疑以東平為南京徙貝
居之盡遷其民又置衛士陰伺動靜貝既歸國命王繼
遠撰建南京碑起書樓于西宮作樂田園詩唐明宗聞
之遣人跨海持書密召貝貝因畋海上使再至貝謂左
右曰我以天下讓主上今反見疑不如適他國以成吳

太伯之名立木海上刻詩曰小山壓大山大山全無力
羞見故鄉人從此投外國攜高美人載書浮海而去唐
以天子儀衛迎貝貝坐船殿衆官陪列上壽至汴見明
宗明宗以莊宗后夏氏妻之賜姓東丹名之曰慕華改
瑞州為懷化軍拜懷化軍節度使瑞慎等州觀察使復
賜姓李名贊華移鎮滑州遙領虔州節度使貝雖在異
國常思其親問安之使不絕後明宗養子從珂弒其君
自立貝密報太宗曰從珂弒君盍討之及太宗立石敬

瑋為晉主加兵于洛從珂欲自焚召貝與俱貝不從遣壯士李彥紳害之時年三十八有一僧為收瘞之敬瑋入洛喪服臨哭以王禮權厝後太宗改葬于醫巫閭山諡曰文武元皇王世宗卽位諡讓國皇帝陵曰顯陵統和中更諡文獻重熙二十年增諡文獻欽義皇帝廟號義宗及諡二后曰端順曰柔貞貝初市書至萬卷藏于醫巫閭絕頂之望海堂通陰陽知音律精醫藥砭灼之術工遼漢文章嘗譯陰符經善畫本國人物如射獵雪

騎千鹿圖皆入宋秘府然性頗刻急好殺婢妾微過常
加剋灼夏氏懼而求削髮為尼五子長世宗次隆科稍
隆先道隱

平王隆先字團隱母大氏景宗卽位始封平王未幾兼
政事令留守東京薄賦稅省刑獄恤鰥寡數薦賢能之
士後與統軍耶律舒魯同討高麗有功還薨葬醫巫閭
山之道隱谷平王為人聰明博學能詩有閭苑集行于
世保寧之季其子辰格與渤海官屬謀殺其父舉兵作

亂上命輓裂于市

晉王道隱字留隱母高氏道隱生于唐人皇王遭李從
珂之害時年尚幼洛陽僧匿而養之因名道隱太宗滅
唐還京詔賜外羅山地居焉性沉靜有文武才時人稱
之景宗卽位封蜀王為上京留守乾亨元年遷守南京
號令嚴肅民獲安業居數年徙封荆王統和初病薨追
封晉王

論曰自古新造之國一傳而太子讓豈易得哉遼之義

宗可謂盛矣然讓而見疑豈不兆於建元稱制之際乎
斯則一時君臣昧於禮制之過也東書浮海寄跡他國
思親不忘問安不絕其心甚有足諒者焉觀其始慕泰
伯之賢而為遠適之謀終疾陳恒之惡而有請討之舉
志趣之卓蓋已見於早歲先祀孔子之言歟善不令終
天道難詰得非性刻嗜殺之所致也雖然終遼之代賢
聖繼統皆其子孫至德之報昭然在茲矣

章肅皇帝小字魯呼一名鴻觀字奚隱太祖第三子母

淳欽皇后舒嚕氏勇悍多力而性殘酷小怒輒黥人面或投水火中太祖嘗觀諸子寢魯呼縮項臥內曰是必在諸子下又嘗大寒命三子採薪太宗不擇而取最先至人皇王取其乾者束而歸後至魯呼取少而棄多既至袖手而立太祖曰長巧而次成少不及矣而母篤愛魯呼天顯五年遣徇地代北攻寰州多俘而還遂立為皇太弟兼天下兵馬大元帥太宗親征常留守京師世宗卽位鎮陽太后怒遣魯呼將兵擊之至泰德泉爲安

圖瑠格所敗太后與世宗隔潢河而陣各言舉兵意即
律烏哲入諫太后曰主上已立宜許之時魯呼在側作
色曰我在烏雲安得立烏哲曰奈公酷暴失人心何太
后顧魯呼曰昔我與太祖愛汝異於諸子諺云偏憐之
子不保業難得之婦不主家我非不欲立汝汝自不能
矣及會議世宗使解劒而言和約既定趨上京會有告
魯呼與太后謀廢立者徙魯呼祖州禁其出入穆宗時
其子喜隱謀反辭逮魯呼囚之死獄中年五十葬玉峯

山西谷統和中追諡欽順皇帝重熙二十一年更諡章
肅后曰和敬二子宋王喜隱衛王完

喜隱字完德雄偉善騎射封趙王應歷中謀反事覺上
臨問有狀以親釋之未幾復反下獄景宗卽位聞有赦
自去其械而朝上怒曰汝罪人何得擅離禁所詔誅守
者復寘于獄及改元保寧乃宥之妻以皇后之姊復爵
王宋喜隱輕僬無恒小得志卽驕上嘗召不時至怒而
鞭之由是憤怒謀亂貶而復召適見上與劉繼元書辭

意卑遜諫曰本朝於漢為祖書旨如此恐虧國體帝尋改之授西南面招討使命之河東索吐蕃戶稍見進用復誘羣小謀叛上命械其手足築圍土囚祖州宋降卒二百餘人欲劫立喜隱以城堅不得入立其子留禮壽上京留守楚實勒擒之留禮壽伏誅賜喜隱死

論曰魯呼殘酷驕盈太祖知其不才而不能教太后不知其惡而溺愛之初以烏哲之言定立世宗而復謀廢立子孫繼以逆誅并及其身可哀也已夫自太祖之世

埒克安圖首倡禍亂太祖旣不之誅又復用之固為有
君人之量然惟太祖之才足以駕馭庶乎其可也魯呼
而下宗王反側無代無之遼之內難與國始終厥後嗣
君雖嚴法以繩之卒不可止烏虜創業垂統之主所以
貽厥孫謀者可不審歟

順宗名濬小字伊囉幹道宗長子母宣懿皇后蕭氏幼
而能言好學知書道宗嘗曰此子聰慧殆天授歟六歲
封梁王明年從上獵矢連發三中上顧左右曰朕祖宗

以來騎射絕人威震天下是兒雖幼不墜其風後遇十
鹿射獲其九帝喜設宴八歲立為皇太子太康元年兼
領北南樞密院事及母后被害太子有憂色耶律伊遜
為北院樞密使常不自安會護衛蕭和克謀害伊遜事
覺下獄副點檢蕭錫沙謂伊遜曰臣民心屬太子公非
閑閑一日若立吾輩措身何地廼與同知北院宣徽事
蕭咭喇台謀構陷太子陰令護尉太保耶律扎拉誣告
都宮使耶律薩喇知院耶律蘇色護衛蕭和克謀廢立

詔案無迹不治伊遜復令牌印郎君蕭額圖琿等言扎拉前告非妄臣實與謀欲殺耶律伊遜等然後立太子臣若不言恐事發連坐帝信之幽太子于別室以耶律雅克鞠案太子具陳枉狀曰吾為儲副尚何所求公當為我辨之雅克乃伊遜之黨易其言為歟伏上大怒廢太子為庶人將出曰我何罪至是錫沙叱登車遣衛士闔其扉徙于上京囚圓堵中伊遜尋遣達嚕噶薩巴往害之太子年方二十上京留守蕭塔坦給以疾薨聞上


哀之命有司葬龍門山欲召其妃伊遜陰遣人并殺之
後知其寃悔恨無及諡曰昭懷太子以天子禮改葬玉
峯山乾統初追尊大孝順聖皇帝廟號順宗妃蕭氏貞
順皇后一子延禧卽天祚皇帝

論曰道宗知太子之賢而不能辨伊遜之詐竟絕父子
之親為萬世惜伊遜知為一身之計不知有君臣之義
豈復知有太子乎姦邪之臣亂人家國如此可不戒哉
可不戒哉

晉王小字額嚕溫天祚皇帝長子母曰文妃蕭氏甫髫
鬣馳馬善射出為大丞相耶律隆運後封晉王性樂道
人善而矜人不能時宮中見讀書者輒斥額嚕溫嘗入
寢殿見實達爾察喇閱書因取觀會諸王至陰袖而歸
之曰勿令他人見也時號稱長者及長積有人望內外
歸心保大元年南軍都統耶律伊都與其母文妃密謀
立之事覺伊都降金文妃伏誅額嚕溫實不與謀免二
年耶律薩巴等復謀立不克上知額嚕溫得人心不忍

加誅令縊殺之或勸之亡額嚕溫曰安忍為葦爾之軀而失臣子之大節就死聞者傷之

論曰天祚不君臣下謀立其子適以殺之額嚕溫重君父之命不亡而死申生其恭矣乎



遼史卷七十二

遼史卷七十二考證 宗室傳

義宗傳小字托雲 原本作圖欲五代歐史作突欲皆
係音近之訛今併改

善畫本國人物如射獵雪騎千鹿圖 原本射字下衍

騎字今刪

五子長世宗次羅和稍隆先道隱 按羅和入逆臣傳

見卷一百十二目錄失載稍封吳王見景宗本紀而

無傳原本稱各有傳係誤今刪

順宗傳伊遜陰遣人殺之後知其寃 原本後知其寃

句上行州字今刪

遼史卷七十二考證

欽定四庫全書

史部

遼史卷七十三

三至九

詳校官庶吉士臣何道冲

給事中臣查善長覆勘

總校官編修臣朱鈐

校對官中書臣程炎

謄錄監生臣方炳

欽定四庫全書

遼史卷七十五

元中書右丞相總裁托克托等修

列傳第三

耶律赫魯

蕭達魯 阿古齊

耶律實訥

隆科

佛提

耶律托雲

耶律哈里

耶律赫魯字現一字洪隱德時勒部人祖實默克簡憲

皇帝兄父烏蘇約尼時為本部額爾奇木赫嚕其長子也性質厚髻髻與太祖遊從父實嚕奇之曰興我家者必二兒也太祖既長相與易裘馬為好然赫嚕事太祖彌謹會華格弑其父實嚕太祖顧赫嚕曰華格弑父料我不能容將反噬我今彼歸罪特依順為解我姑與之是賊吾不忘也自是赫嚕常佩刀從太祖以備不虞居久之赫嚕父烏蘇病召赫嚕曰安巴堅神畧天授汝率諸弟赤心事之已而太祖來問疾烏蘇執其手曰爾命

世奇才吾免赫魯者他日可委以事吾已諭之矣既而
以諸子屬之太祖為塔瑪轄實呼參預部族事赫魯領
數騎召小黃室韋來附太祖素有大志而知赫魯賢軍
國事非赫魯議不行會討裕爾庫與烏爾古部赫魯為
前鋒戰有功及太祖為德呼勒部額爾奇木討奚部其
長珠爾偏險而壘攻莫能下命赫魯持一箭往諭之既
入為奚所執廼說奚曰契丹與奚實一國也我額爾奇
木豈有較轢之心哉漢人殺我祖奚首額爾奇木怨刺

骨日夜思報顧力單弱使我求援於奚傳矢以示信耳
額爾奇木受命於天撫下以德故能有此衆也今奚殺
我違天背德不祥莫大焉且兵連禍結當自此始豈爾
國之利乎珠爾感其言乃降太祖為裕悅秉國政欲命
赫魯為德噶勒部額爾奇木辭曰賊在君側未敢遠去
太祖討黑車子室韋幽州劉仁恭遣趙霸率衆來救赫
魯伏兵桃山俟霸衆過半而要之與太祖合擊斬獲甚
衆遂降室韋太祖會李克用于雲州時赫魯侍克用顧

而壯之曰偉男子為誰太祖曰吾族赫魯也會約尼哈
陶津汗歿羣臣奉遺命請立太祖太祖辭曰昔吾祖額
爾奇木聶呼嘗以不當立而辭今若等復為是言何歟
赫魯進曰曩吾祖之辭遺命弗及符瑞未見第為國人
所推戴耳今先君言猶在耳天人所與若合符契天不
可逆人不可拂而君命不可違也太祖曰遺命固然汝
焉知天道赫魯曰聞裕悅之生也神光屬天異香盈幄
夢受神誨龍錫金佩天道無私必應有德我國削弱薊

齟於隣部日久以故天生聖人以興起之汗知天意故有是命且約尼九營綦布非無可立者小大臣民屬心裕悅天也昔者裕悅伯父實嚕嘗曰吾猶蛇兔猶龍也天時人事幾不可失太祖猶未許是夜獨召赫嚕責曰衆以遺命迫我汝不明吾心而亦俛隨耶赫嚕曰昔額爾奇木聶呼雖推戴者衆辭之而立蘇爾威為汗相傳十餘世君臣之分亂紀綱之統隳委質他國若綴旒然羽檄騷午民疲奔命興王之運實在今日應天順人以

答顧命不可失也太祖乃許明日即皇帝位命赫魯總
軍國事時制度未講國用未充扈從未備而諸弟埒克
等往往覬非望太祖宮行營始置腹心部選諸部豪健
二千餘充之以赫魯及蕭達魯總焉已而諸弟亂作太
祖命赫魯總軍事討平之以功為德呼勒部額爾奇木
時民更兵焚剽日以抗敵赫魯撫輯有方畜牧盛滋民
用富庶乃討烏爾古部破之自是震懾不復叛迺請制
朝儀建元率百官上尊號太祖既備禮受冊拜赫魯為

阿勒坦裕悅阿勒坦言貴重如金也後太祖伐西南諸
夷數為前鋒神冊二年從逼幽州與唐節度使周德威
拒戰汗州西敗德威軍遂圍幽州未下太祖以時暑班
師留赫魯與盧國用守之俄而救兵繼至赫魯等以軍
少無援退三年七月皇都既成燕羣臣以落之赫魯是
月得疾薨年四十七既葬賜名其阡諱達山曰裕悅峪
詔立石紀功清寧間命立祠上京初赫魯病革太祖臨
視問所欲言赫魯曰陛下聖德寬仁羣生咸遂帝業隆

興臣蒙寵遇雖瞋目無憾惟析德呼勒部議未決願亟行之及薨太祖流涕曰斯人若登三五載吾謀蔑不濟矣後太祖二十一功臣各有所擬以赫魯為心云子塔喇薩喇俱不仕

論曰赫魯以肺腑之親任帷幄之寄言如蓍龜謀成戰勝可謂算無遺策矣其君臣相得之誠庶吳漢之於光武歟夫信其所可信智也太祖有焉故曰惟聖知聖惟賢知賢斯近之矣

蕭達魯字達年其母為德祖女弟而淳欽皇后又其女兄也五世祖曰瑚穆哩約尼氏時嘗使唐唐留之幽州一夕折關遁歸國由是世為決獄官達魯性寬厚膂力絕人習軍旅事太祖潛藩日待左右凡征討必與行陣既即位達魯與弟阿古齊耶律實魯耶律赫魯皆總宿衛拜達魯北府宰相世其官太祖征奚及討劉守光達魯畧地海濱殺獲甚衆頃之埒克等作亂潰而北走達魯率輕騎追之兼晝夜行至榆河敗其黨獲埒克以獻

太祖嘉之錫賚甚渥後討西南夷功居諸將先神冊三年十二月卒達魯有膽畧聞敵所在即馳赴親冒矢石前後戰未嘗少衄必勝乃止以故在太祖功臣列喻以手云弟阿古齊

阿古齊字薩巴少卓越自放不羈長驍勇善射臨敵敢前每射甲楯輒洞貫太祖為裕悅時以材勇充任使既即位與達魯總腹心部埒克之亂也淳欽皇后軍黑山阻險自固太祖方經畧奚地命阿古齊統百騎往衛之

逆黨特爾特耶律華格素憚其勇畧相戒曰是不可犯也埒克既北走與達魯追擒于榆河神冊初元討西南夷有功徇山西諸郡縣又下之敗周德威軍三年以功拜北府宰相世其職天贊初與王郁畧地燕趙破磁窯鎮太祖西征悉委以南面邊事攻渤海破扶餘城獨將騎兵五百敗老相軍三萬渤海既平改東丹國項之已降郡縣復叛盜賊蜂起阿古齊與康默記討之所向披靡會賊游騎七千自鴨綠府來援勢張甚阿古齊帥麾

下精銳直犯其鋒一戰克之斬馘二千餘遂進軍破輝
發城以病卒功臣中喻阿古齊為耳云子安圖官至右
皮室詳袞

耶律實訥齊字薩喇六院部錫里尼古察之族始字堆
音早隸太祖幕下嘗有疾賜罇酒飲而愈承詔易字遂
易之曰薩喇焉及太祖即位掌腹心部天贊初分德呼
勒部為北南院實訥齊為北院額爾奇木帝西征至流
沙諸夷聞威聲潰散命實訥齊撫集之及討渤海破扶

餘城實訥齊從太子大元帥率衆夜圍輝罕城大譴謨降已而復叛命諸將分地攻之詰旦實訥齊感勵士伍鼓譟登陴敵震懾莫敢禦遂破之天顯中卒年七十居佐命功臣之一姪隆科佛德

隆科字薩蘭其母淳欽皇后姊也隆科幼養宮掖既長沉毅有勇畧隸太祖帳下既即位屢有戰功埒克之亂也欲乘我不備為掩襲計給降太祖將納之命隆科耶律托雲嚴號令勒士卒控轡以防其變逆黨知有備懼

而遁以功授右皮室詳袞典宿衛太祖侵燕趙遇唐兵雲碧店隆科恃勇輕敵直犯其鋒戰久之被數創歸營而卒太祖深悼惜之佐命功臣其一也

佛德字烏庫哩弱冠事太祖天顯初為左皮室詳袞典宿衛遷南院額爾奇木治有聲石敬瑭破張敬達軍於太原北佛德勒兵為援敬達遁敬瑭追至晉安寨圍之佛德領輕騎襲潞州塞其餉道唐將殺敬達以降會同初改德呼勒部額爾奇木為大王即拜佛德既而加採

訪使舊制肅祖以下宗室稱院德祖宗室號三父房稱橫帳百官子弟及籍沒人稱著帳耶律實迪言橫帳班列不可與北南院竝太宗詔在廷議皆曰然乃詔橫帳班列居上佛德奏曰伏見官制北南院大王品在特哩袞上今橫帳始圖爵位之高願與北南院參任茲又恥與同列夫橫帳與諸族皆臣也班列奚以異帝乃諭百官曰朕所不知卿等不宜面從詔仍舊制其強直不撓如此佛德狀貌秀偉初太祖見之曰是子風骨異常免

必為國器後果然卒年四十九

耶律欲穩字錫里雅圖魯卜部人祖塔雅克約尼時為北邊伊喇簡獻皇后與諸子之罹難也嘗倚之以免太祖思其功不忘又多其嚴重有濟世志乃命典司近部以遏諸族窺覲之想欲穩既見器重益感奮思報太祖始置宮分以自衛欲穩率門客首附宮籍帝益嘉其忠詔以塔雅克配享廟廷及平埒克等亂以功遷奚德呼勒部額爾奇木從征渤海有功天顯初卒後諸帝以太

祖與之有故往往取其子孫為友宮分中稱八房皆其後也弟轄哩終奚六部圖哩

耶律哈里字羅爾琨約尼兆古汗之裔孫太祖傳位哈里與有力焉初受命屬籍比局萌覬覦而約尼故族尤缺望哈里多先帝知人之明而素服太祖威德獨歸心焉以故太祖託為耳目數從征討既靖內亂始置約尼詳袞令哈里領之天顯初征渤海哈里將約尼紇破輝罕城師班卒

遼史卷七十三

遼史卷七十三考證

耶律赫魯傳拜赫魯為阿勒坦裕悅 阿勒坦原本作
阿魯敦按太祖本紀又作阿廬朶係音譯之訛今併
改

遼史卷七十三考證

欽定四庫全書

遼史卷七十四

元中書右丞相總裁托克托等修
列傳第四

耶律迪里

蕭罕都

康默記

延壽

韓延徽

德樞
紹芳

紹勳
資讓

韓知古

匡嗣

德原

德凝

耶律迪里字和掄約尼森濟汗之子太祖旣踐阼與詳

衮哈里同心輔政太祖深知其忠實命掌禮儀且委以軍事後以平內亂功代轄哩為奚六部圖哩卒迪里善騎射頗好禮文

蕭罕都字裕勒沁德呼勒部人其先相約尼氏罕都少慷慨以才自任早隸太祖帳下數從征討既踐阼除北府宰相罕都事親孝為政尚寬簡

康熙記本名照少為薊州衛校太祖侵薊州得之愛其材隸麾下一切番漢相涉事屬默記折衷之悉合上意

時諸部新附文法未備默記推析律意論決重輕不差毫釐罹禁網者人人自以為不寃頃之拜左尚書神冊三年始建都默記董役人咸趨事百日而訖五年為皇都伊勒希巴會太祖出師居庸關命默記將漢軍進逼長蘆水寨俘馘甚衆天贊四年親征渤海默記與韓知古從後大譴譟叛命諸將攻之默記分薄東門率驍勇先登既拔與韓延徽下長嶺府軍還已下城邑多叛默記與阿古齊平之既破輝發城歸營太祖山陵畢卒佐

命功臣其一也孫延壽字眉昌少倜儻謂其所親大夫為將當效節邊垂馬革裹屍景宗特授千牛衛大將軍宋人攻南京諸將既成列延壽獨奮擊陣前敵遂大潰以功遙授保大軍節度使乾寧三年卒

韓延徽字藏明幽州安次人父夢殷官薊儒順三州刺史延徽少英敏燕帥劉仁恭奇之召為幽都府文學平州錄事參軍同馮道祗候院授幽州觀察度支使後守光為帥延徽來聘太祖怒其不屈留之舒嚕后諫曰彼

秉節弗撓賢者也奈何困辱之太祖召與語合上意立
命參軍事攻党項室韋服諸部落延徽之籌居多乃請
樹城郭分市里以居漢人之降者又為定配偶教墾藝
以生養之以故逃亡者少居久之慨然懷其鄉里賦詩
見意遂亡歸唐已而與他將王緘有隙懼及難乃省親
幽州匿故人王德明舍德明問所適延徽曰吾將復走
契丹德明不以為然延徽笑曰彼失我如失左右手其
見我至必大喜既至太祖問故延徽對曰忘親非孝棄

君非忠臣雖挺身逃臣心常在陛下臣是以復來上大
悅賜其名曰實喇卽命為守政事令崇文館大學士凡
中外事悉令參決焉天贊四年從征渤海大譴譔乞降
既而復叛與諸將破其城以功拜左僕射又與康默記
攻長嶺府拔之師還太祖崩哀動左右太宗朝封魯國
公仍為政事令使晉還改南京三司使世宗朝遷南府
宰相建政事省設張理具稱盡力吏天祿五年六月河
東使請行冊禮帝召延徽定其制延徽奏一遵太宗冊

晉帝禮從之應歷中致仕子德樞鎮東平詔許每歲東歸省九年卒年七十八上聞震悼贈尚書令葬幽州之魯郭世為崇文令公初延徽南奔太祖夢白鶴自帳中出比還復入帳中詰旦謂侍臣曰延徽至矣已而果然太祖初元庶事草創凡營都邑建宮殿正君臣定名分法度井井延徽力也為佐命功臣之一子德樞德樞年甫十五太宗見之謂延徽曰是兒卿家之福朕國之寶真英物也未冠守左羽林大將軍遷特進太尉時漢人

降與轉徙者多寓東平丁歲蓄饑饉疾癘德樞請往撫
字之授遼興軍節度使下車整紛剔蠹恩煦信孚勸農
桑興教化期月民獲蘇息入為南院宣徽使遙授天平
軍節度使平濬營三州管內觀察處置等使門下平章
事已而加開府儀同三司行侍中封趙國公保寧元年
卒孫紹勲紹芳紹勲仕至東京戶部使會大延琳叛被
執辭不屈賊以鋸解之憤罵至死紹芳重熙間參知政
事加兼侍中時廷議征李元昊力諫不聽出為廣德軍

節度使聞敗嘔血卒孫資讓壽隆初拜中書侍郎平章
事會宋徽宗嗣位遣使來報有司按籍有登寶位文坐
是出為崇義軍節度使改鎮遼興卒

韓知古薊州玉田人善謀有識量太祖平薊時知古六
歲為淳欽皇后兄欲穩所得后來嬪知古從焉未得省
見久之負其有怏怏不得志挺身逃庸保以供資用其
子匡嗣得親近太祖因間言太祖召見與語賢之命參
謀議神冊初遙授彰武軍節度使久之信任益篤總知

漢兒司事兼主諸國禮儀時儀法疏闊知古援據故典
參酌國俗與漢儀雜就之使國人易知而行頃之拜左
僕射與康默記將漢軍征渤海有功遷政事令天顯中
卒為佐命功臣之一子匡嗣

匡嗣以善醫直長樂官皇后視之猶子應歷十年為太
祖廟詳袞後宋王喜隱謀叛辭引匡嗣上置不問初景
宗在藩邸善匡嗣卽位拜上京留守頃之王燕改南京
留守保寧末以留守攝樞密使時耶律和克使宋還言

宋人必取河東合先事以為備匡嗣詆之曰寧有是已而宋人果取太原乘勝逼燕匡嗣與南府宰相沙特哩袞休格侵宋軍滿城方陣宋人請降匡嗣欲納之休格曰彼軍氣甚銳疑誘我也可整頓士卒以禦匡嗣不聽俄而宋軍鼓譟薄我衆蹙踐塵起漲天匡嗣倉卒諭諸將無當其鋒衆既奔遇伏兵扼要路匡嗣棄旗鼓遁其衆走易州山獨休格收所棄兵械全軍還帝怒匡嗣數之曰違爾衆謀深入敵境爾罪一也號令不肅行伍不

整爾罪二也棄我師旅挺身鼠竄爾罪三也偵候失機
守禦弗備爾罪四也捐棄旗鼓損威辱國爾罪五也促
令誅之皇后引諸內戚徐為開解上重違其請良久威
稍霽乃杖而免之既而遙授晉昌軍節度使乾亨二年
改西南面招討使卒睿智皇后聞之遣使臨弔賻贈甚
厚後追贈尚書令五子德源德讓後賜名隆運德威德
崇德凝德源德凝附傳餘各有傳

德源性愚而貪早侍景宗邸及卽位列近侍保寧間官

崇義興國二軍節度使加檢校太師以賄名德讓貽書諫之終不悛以故論者少之後加同政事門下平章事遙攝保寧軍節度使乾亨初卒

德凝謙遜廉謹保寧中遷護軍司徒統和中累遷護衛太保都宮使崇義軍節度使移鎮廣德扶滿部民請留從之改西南面招討使党項隆伊特叛平之遷大同軍節度使卒于官子果桑終天德軍節度使孫高嘉努終南院宣徽使果實終遼興軍節度使

遼史卷七十四

遼史卷七十四考證

康默記傳神冊五年為皇都伊勒希巴 按太祖紀天
顯元年遣額爾奇木康默記攻長嶺府是默記以伊
勒希巴又為額爾奇木傳失載

天祿五年六月河東使請行冊禮 按世宗本紀天祿
五年六月劉崇為周所攻稱姪乞援且求封冊帝遣
使冊為漢帝原本訛作三年今據改

韓知古傳遷政事令 按百官志政事令太祖所置官

興宗重熙十三年始改中書省韓知古之為令在太祖時則政事令也原本訛作中書今據改

匡嗣傳既而遙授晉昌軍節度使乾亨二年改西南面招討使卒 按景宗紀乾亨元年匡嗣遙授晉昌軍節度使降封秦王傳失載其改西南面招討使紀作三年與傳亦互異

德源傳保寧間官崇義興國二軍節度使 保寧原本作統和按德源以乾亨初卒乾亨為景宗年號統和

爲聖宗年號卒在先而事反在後矣又考德源父子兄弟俱早侍景宗卽其弟德讓德威德凝遷擢俱始於保寧德崇之子制心統和中亦爲刺史德源爲長兄不應於聖宗朝始仕其爲保寧之訛無疑今據改德凝傳統和中累遷護衛太保都宮使崇義軍節度使統和原本作開泰考聖宗紀統和三年德凝由彰武軍節度使爲崇義軍節度使又屬國表統和十九年西南面招討奏党項之捷而佚其名以事考之當

卽德凝則開泰當為統和今據改

遼史卷七十四考證

欽定四庫全書

遼史卷七十五

元中書右丞相總裁托克托等修

列傳第五

耶律迪里

伊濟

耶律都沁

古

圖魯卜

王郁

耶律圖勒錦

耶律迪里字裕勒沁六院部博果濟額爾奇木之後父
烏蘓亦為額爾奇木初太祖為裕悅時迪里以謹厚見

器使既即位兄赫魯典宿衛迪里入侍帷幄與聞政事
神冊三年赫魯薨命迪里為德呼勒部額爾奇木屬以
南方事會討党項皇太子為先鋒迪里副之軍至天德
雲內分道並進迪里率偏師渡河力戰斬獲甚衆天贊
初析德呼勒部為北南院置額爾奇木時大元師率師
由古北口畧燕地迪里徇山西所至克捷太祖嘉其功
錫賚甚厚從伐渤海拔扶餘城留迪里與伊德實守之
天顯二年留守南京十年卒年五十六弟伊濟

伊濟小字烏里字伊德森幼豪爽不羣長嗜學通諸部
語太祖經營之初多預軍謀天顯元年渤海平立皇太
子為東丹王以伊濟為中臺省右次相時人心未安左
大相迪里不踰月薨伊濟莅事勤恪威信並行太宗即
位上表曰我大聖天皇始有東土擇賢輔以撫斯民不
以臣愚而任之國家利害敢不以聞渤海昔畏南朝阻
險自衛居輝罕城今去上京遼邈既不為用又不罷戍
果何為哉先帝因彼離心乘釁而動故不戰而克天授

人與彼一時也遺種寢以蕃息今居遠境恐為後患梁
水之地乃其故鄉地衍土沃有木鐵鹽魚之利乘其微
弱徙還其民萬世長策也彼得故鄉又獲木鐵鹽魚之
饒必安居樂業然後選徙以翼吾左突厥党項室韋夾
輔吾右可以坐制南邦混一天下成聖祖未集之功貽
後世無疆之福表奏帝嘉納之是歲詔徙東丹國民於
梁水時稱其善人皇王奔唐伊濟鎮撫國人一切如故
以功加守太傅遷中臺省左相會同初以冊禮赴闕加

特進表奏左次相渤海蘓貪墨不法事卒子和哩終東
京留守

耶律都沁字達年六院部人祖博果濟約尼氏時再為
本部額爾奇木耶律朗德等既害玄祖暴橫益肆博果
濟以計誘其黨悉誅之都沁幼有志節太祖為裕悅常
居左右後即位梁人遣使求轅軸材太祖難之都沁曰
梁名求材實覘吾輕重宜答曰材之所生必深山窮谷
有神司之須白鼻赤驢禱祠然後可伐如此則其語自

塞矣已而果然天贊三年將伐渤海都沁諫曰陛下先
事渤海則西夏必躡吾後請先西討庶無後顧憂太祖
從之及淳欽皇后稱制惡都沁囚之誓曰鐵鎖朽當釋
汝既而召之使者欲去鎖都沁辭曰鐵未朽可釋乎后
聞嘉歎趣召釋之天顯二年卒弟古圖魯卜

古字鼎爾琨初名實默克太祖為裕悅嘗從畧地山右
會李克用於雲州古侍克用異之曰是兒骨相非常不
宜使在左右以故太祖頗忌之時方西討諸弟亂作聞

變太祖問古與否曰無喜曰吾無患矣趣召古議古陳
珍滅之策後皆如言以故賜賚甚厚神冊末南伐以古
佐右皮室詳袞隆科與唐兵戰于雲碧店隆科中流矢
傷甚太祖疑古陰害之古知上意跪曰陛下疑臣恥居
隆科麾下耶及今隆科在請遣使問之太祖使問隆科
對曰臣於古無可疑者上意乃釋隆科卒遂以古為右
皮室詳袞既卒太祖謂左右曰古死猶長松自倒非吾
伐之也

圖魯卜字鐸袞幼聰敏嗜學事太祖見器重及製契丹大字圖魯卜贊成為多未幾為文班林牙領國子博士知制誥明年受詔撰決獄法太祖畧燕詔與皇太子及王郁攻定州師還至順州幽州馬步軍指揮使王千率衆來襲圖魯卜射其馬躡擒之天贊二年皇子耀庫濟為大元帥圖魯卜為副既克平州進軍燕趙下曲陽北平至易州易人來拒踰濠而陣李景章出降言城中人無鬪志大元帥將修攻具圖魯卜諫曰我師遠來人馬

疲憊勢不可久留乃止軍還大元帥以其謀聞太祖大
悅賜賚優渥車駕西征圖魯卜與大元帥為先鋒伐党
項有功太祖犒師水精山大元帥東歸圖魯卜留屯西
南部復討党項多獲而還太祖東伐大譴譟降而復叛
攻之圖魯卜先登渤海平承詔銘太祖功德于永興殿
壁班師已下州郡往往復叛圖魯卜從大元帥攻破之
淳欽皇后稱制有飛語中傷者后怒圖魯卜懼而亡太
宗知其無罪召還天顯三年討烏爾古部俘獲甚衆伐

唐以圖魯卜為左翼攻唐軍霞沙寨降之十一年送晉主石敬瑭入洛及大冊圖魯卜總禮儀事加特進檢校太尉會同五年卒

王郁京兆萬年人唐義武軍節度使處直之孽子伯父處存鎮義武卒三軍推其子郃襲處直為都知兵馬使光化三年梁王朱全忠攻定州郃遣處直拒于沙河兵敗入城逐郃郃奔太原亂兵推處直為留後遣人請事梁王梁與晉王克用絕好表處直為義武軍節度使初

部之亡也郁從之晉王克用妻以女用為新州防禦使處直料晉必討張文禮鎮亡則定不獨存益自疑陰使郁北導契丹入塞以牽晉兵且許為嗣郁自奔晉常恐失父心得使大喜神冊六年奉表送款舉室來降太祖以為養子未幾郁兄都囚父自為留後帝遣郁從皇太子討之至定州都堅壁不出掠居民而還明年從皇太子攻鎮州遇唐兵于定州破之天贊二年秋郁及阿古齊畧地燕趙攻下磁窯務從太祖平渤海戰有功加同

政事門下平章事改崇義軍節度使太祖崩郁與妻會葬其妻泣訴於淳欽皇后求歸鄉國許之郁奏曰臣本唐主之壻王已被弑此行夫妻豈能相保願常侍太后后喜曰漢人中惟王郎最忠孝以太祖常與李克用約爲兄弟故也尋加政事令還宜州卒

耶律圖勒錦字額哩音肅祖子學順之孫勇而有謀太宗立晉之役其父達嚕噶爲五院額爾奇木歿于兵帝即以其職授圖勒錦會同元年改北院大王嘗屏左右

與議大事占對合上意從討石重貴杜重威擁十萬餘
衆拒滹沱橋力戰數日不得進帝曰兩軍爭渡人馬疲
矣計安出諸將請緩師爲後圖帝然之圖勒錦厲色進
曰臣愚竊以爲陛下樂於安逸則謹守四境可也旣欲
擴大彊宇出師遠攻詎能無慮聖慮若中路而止適爲
賊利則必陷南京夷屬邑若此則爭戰未已吾民無莫
枕之期矣且彼步我騎何慮不克況漢人足力弱而行
緩如選輕銳騎先絕其餉道則事蔑不濟矣帝喜曰國

強則其人賢海巨則其魚大於是塞其餉道數出師以牽撓其勢重威果降如言以功獲賜甚厚明年春卒軍

中

論曰神冊初元將相大臣拔起風塵之中翼扶王運以任職取名者固一時之材亦由太祖推誠御下不任獨斷用能總攬羣策而爲之用歟其投天隙而列功庸至有心腹耳目手足之諭豈偶然哉討党項走達魯平埒克定渤海功亦偉矣若默記治獄不寃佛德持論不撓

延徽立經陳紀紹勲秉節而死圖勒錦料敵制勝宣器
博者無近用道長者其功遠歟稱爲佐命固宜

遼史卷七十五

遼史卷七十五考證

王郁傳郁兄都囚父自爲留後帝遣郁討之至定州都
堅壁不出掠居民而還按資治通鑑望都之敗契
丹主切責王郁繫之以歸自是以後不聽其謀遼史
不載其事

遼史卷七十五考證

欽定四庫全書

遼史卷七十六

元中書右丞相總裁托克托等修

列傳第六

耶律嘉哩

耶律巴哩岱

耶律碩格

耶律羅卜科

趙延壽

高模翰

趙思溫

耶律烏魯斯

張礪

耶律嘉哩字布當圖魯卜部人世為小吏嘉哩早隸太宗麾下擢為軍校天顯間唐攻定州既陷嘉哩為唐兵所獲晉高祖立始歸國太宗賞其罪拜御史大夫會同九年伐晉師次潯沱河奪中渡橋降其將杜重威上命嘉哩與降將張彥澤率騎兵三千疾趨河南所至無敢當其鋒既入汴嘉哩等遷晉王重貴於開封府彥澤恣殺掠亂官掖嘉哩不能禁百姓騷然莫不怨憤車駕至

京數彥澤罪斬於市汴人大悅嘉哩亦被詰責尋釋之
天祿間加守太子太傅應歷初置本部令公嘉哩世其
職卒

耶律巴哩岱字海蘭太祖弟埒克之子太宗即位以親
愛見任會同七年討石重貴巴哩岱進圍德州下之擒
刺史師居璠等二十七人九年再舉兵次溥沱河降杜
重威戰功居多太宗入汴以功授安國軍節度使總領
河北道事師還州郡往往叛以應劉知遠巴哩岱不能

守而歸世宗即位遷中京留守卒

耶律碩格字穆克德橫帳孟父之後幼為太祖所養既冠為右皮室詳袞從征渤海有功天顯七年授三河烏爾古部都詳袞平易近民民安之以故久其任會同間為特哩袞時晉主重貴渝盟帝親征晉將杜重威擁衆拒潯沱月餘帝由他渡濟碩格與趙延壽據中渡橋重威兵却遂降是歲入汴世宗即位碩格奉太宗喪歸上京佐皇太后出師坐是免官卒

耶律羅卜科字信寧太祖從姪也初太祖制契丹國字
羅卜科以贊成功授林牙監修國史後率偏師為西南
邊大詳袞從伐党項有功會河東節度使石敬瑭為其
主所討遣人求援羅卜科導送於朝如其請帝親率師
往援羅卜科從擊唐將張敬達於太原北敗之會同初
從討党項俘獲最諸將師還天冊中拜裕悅六年為北
院大王終年五十五

趙延壽本姓劉恒山人父邠令舊梁開平初滄州節度

使劉守文陷蓆其裨將趙得鈞獲延壽養以為子少美容貌好書史唐明宗先以女妻之及即位封其女為興平公主拜延壽駙馬都尉樞密使明宗子從榮恃權跋扈內外莫不震懾延壽求補外避之出為宣武軍節度使清泰初加魯國公復為樞密使鎮許州石敬瑭發兵太原唐遣張敬達往討會敬達敗保晉安寨延壽與德鈞往救聞晉安已破走團栢峪太宗追及延壽與其父俱降明年德鈞卒以延壽為幽州節度使封燕王及改

幽州為南京遷留守總山南事天顯末以延壽妻在晉
詔取之以歸自是益自激昂圖報會同初帝幸其第加
政事令冬晉人背盟帝親征延壽為先鋒下貝州授魏
博等州節度使封魏王敗晉軍于南樂獲其將賽項羽
軍元城晉將李守貞高行周率兵來逆破之至頓丘會
大霖雨帝欲班師延壽諫曰晉軍屯河濱不敢出戰若
徑入澶州奪其橋則晉不足平上然之適晉軍先歸澶
州高行周至析城延壽將輕兵逆戰上親督騎士突其

陣敵遂潰師還留延壽徇貝冀深三州八年再伐晉晉主遣延壽族人趙行實以書來招時晉人堅壁不出延壽紿曰我陷遼久寧忘父母之邦若以軍逆我即歸晉人以為然遣杜重威率兵迎之延壽至溥沱河據中渡橋與晉軍力戰手殺其將王靖兩軍相拒太宗潛由他渡濟留延壽與耶律碩格據橋敵不能奪屢敗之杜重威埽厥衆降上喜賜延壽龍鳳赭袍且曰漢兵皆爾所有爾宜親往撫慰延壽至營杜重威李守貞迎謁馬首

後太宗克汴延壽因李崧求為皇太子上曰吾於魏王雖割肌肉亦不惜但皇太子須天子之子得為魏王豈得為也蓋上嘗許滅晉後以中原帝延壽以故摧堅破敵延壽常以身先至是以崧達意上命遷延壽秩翰林學士承旨張礪進擬中京留守大丞相錄尚書事都督中外諸軍事上塗錄尚書事都督中外諸軍事世宗即位以翌戴功授樞密使天祿二年薨

高模翰一名松渤海人有膂力善騎射好談兵初太祖

平渤海模翰避地高麗王妻以女因罪亡歸坐使酒殺
人下獄太祖知其才賞之天顯十一年七月唐遣張敬
達楊光遠帥師五十萬攻太原勢銳甚石敬瑭遣人求
救太宗許之九月徵兵出太原模翰與敬達軍接戰敗
之太原圍解敬瑭夜出謁帝約為父子帝召模翰等賜
以酒饌親饗士卒士氣益振翌日復戰又敗之敬達鼠
竄晉安寨模翰獻俘於帝會敬瑭自立為晉帝光遠斬
敬達以降諸州悉下上諭模翰曰朕自起兵百餘戰卿

功第一雖古名將無以加乃授上將軍會同元年冊禮告成宴百官及諸國使于二儀殿帝指模翰曰此國之勇將朕統一天下斯人之力也羣臣皆稱萬歲及晉叛盟出師南伐模翰為統軍副使與僧額前驅拔赤城破德貝諸寨是冬兼總左右鐵鷄子軍下關南城邑數十三月勅虎官楊覃赴乾寧軍為滄州節度使田武名所圍模翰與趙延壽聚議往救俄有光自模翰目中出縈繞旗矛燄燄如流星久之模翰喜曰此天贊之祥遂進

兵殺獲甚衆以功加侍中畧地鹽山破饒安晉人震怖不敢接戰加太傅晉以魏府節度使杜重威領兵三十萬來拒模翰謂左右曰軍法在正不在多以多陵少不義必敗其晉之謂乎詰旦以麾下三百人逆戰殺其先鋒梁漢璋餘兵敗走手詔褒美比漢之李陵項之杜重威等復至潯沱河帝召模翰問計上善其言曰諸將莫及此乃令模翰守中渡橋及戰復敗之上曰朕憑高觀兩軍之勢顧卿英銳無敵如鷹逐雉當圖形麟閣爵

馳後裔已而杜重威等降車駕入汴加特進檢校太師
封愬郡開國公賜璽書劔器為汴州巡檢使平汜水諸
山土賊遷鎮中京天祿二年加開府儀同三司賜對衣
鞍勒名馬應歷初召為中臺省右相至東京父老歡迎
曰公起戎行致身富貴為鄉里榮相如買臣輩不足過
也九年正月遷左相卒

趙思溫字文美盧龍人少果銳膂力兼人隸燕帥劉仁
恭幕李存勗問罪于燕思溫統偏師拒之流矢中目裂

囊漬血戰猶不已為存勗將周德威所擒存勗壯而釋其縛久之日見信用與梁戰於莘縣以驍勇聞授平州刺史兼平營薊三州都指揮使神冊二年太祖遣大將經畧燕地思溫來降及伐渤海以思溫為漢軍都團練使力戰拔扶餘城身被數創太祖親為調藥太宗即位以功擢檢校太保保靜軍節度使天顯十一年唐兵攻太原石敬瑭遣使求救上命思溫自嵐憲間出兵援之既罷兵改南京留守盧龍軍節度使管内觀察處置等

使開府儀同三司兼侍中賜協謀靜亂翊聖功臣尋改
臨海軍節度使會同初從耶律德呼使晉行冊禮還加
檢校太師二年有星隕于庭卒上遣使賻祭贈太師魏
國公子延昭延靖官至使相

耶律烏魯斯六院額爾奇木博果濟之後負勇畧每戰
被重鎧揮鐵槊所向披靡會同間伐晉上至河獵適海
東青鵲搏雉晉人隔水以鵲引去上顧左右曰誰為我
得此人烏魯斯請內廐馬濟河擒之并殺救者數人還

上大悅優加賞賚既而晉將杜重威逆於望都據水勒
戰烏魯斯介馬突陣餘軍繼之被圍衆言陣薄處可出
烏魯斯曰恐彼有他備竟引兵衝堅而出迴視衆所指
皆大塹也其料敵多此類是年總領迪里皮室軍坐私
免部曲奪官卒

張礪磁州人初仕唐為掌書紀遷翰林學士會石敬瑭
起兵唐主以礪為招討判官從趙德鈞援張敬達于河
東及敬達敗礪入契丹後太宗見礪剛直有文彩擢翰

林學士礪臨事必盡言無所避上益重之未幾謀亡歸
為追騎所獲上責曰汝何故亡礪對曰臣不習北方土
俗飲食居處意常鬱鬱以是亡耳上顧通事高彥英曰
朕嘗戒汝善遇此人何乃使失所而亡礪去可再得耶
遂杖彥英而謝礪會同初陞翰林承旨兼吏部尚書從
太宗伐晉入汴諸將蕭翰耶律郎伍滿達輩肆殺掠礪
奏曰今大遼始得中國宜以中國人治之不可專用國
人及左右近習苟政令乖失則人心不服雖得之亦將

失之上不聽改右僕射兼門下侍郎平章事項之車駕
北還至藥城崩時礪在恒州蕭翰與滿達以兵圍其第
礪方卧病出見之翰數之曰汝何故於先帝言國人不
可為節度使我以國舅之親有征伐功先帝留我守汴
以為宣武軍節度使汝獨以為不可又譖我與嘉哩好
掠人財物子女今必殺汝趣令鎖之礪抗聲曰此國家
大體安危所繫吾實言之欲殺即殺奚以鎖為滿達以
礪大臣不可專殺乃救止之是夕礪恚憤卒

論曰初晉因遼之兵而得天下故兼臣禮而父事之割地以為壽輸帛以為貢未久也而會同之師次滹沱矣豈羣帥貪功黷武而致然歟抑所謂信不由衷也哉模翰以功名自終可謂良將若延壽之勲雖著至于覬覦儲位謬矣利令智昏固無足議若乃成末釁以虧儁功如嘉哩者何譏焉

遼史卷七十六

遼史卷七十六考證

趙延壽傳世宗即位以翊戴功授樞密使天祿二年薨
按延壽之圖自立世宗之執延壽資治通鑑紀載
甚詳遼史皆不載

趙思溫傳子延昭按延昭資治通鑑作延照在石晉
為祁州刺史

遼史卷七十六考證

欽定四庫全書

遼史卷七十七

元中書右丞相總裁托克托等修

列傳第七

耶律烏哲

耶律吼

和勒博

耶律安圖

耶律幹

耶律托雲

耶律塔喇

耶律烏哲字達年系出孟父房姿簡靜有器識重然諾

遇事造次處之從容人莫能測博學知天文會同間為特哩袞太宗崩諸大臣立世宗太后聞之怒遣皇子魯呼以兵逆擊遇安圖瑠格等于泰德泉敗歸魯呼盡執世宗臣僚家屬謂守者曰我戰不克先殪此曹人皆怕怕相謂曰若果戰則是父子兄弟相夷矣軍次潢河橫渡隔岸相拒時烏哲從太后世宗以烏哲善籌欲行間乃設事奉書以試太后太后得書以示烏哲烏哲讀竟言曰太后佐太祖定天下故臣願竭死力若太后見疑

臣雖欲盡忠得乎為今之計莫若以言和解事必有成
否即宜速戰以決勝負然人心一搖國禍不淺惟太后
裁察太后曰我若疑卿安肯以書示汝烏哲對曰魯呼
永康王皆太祖子孫神器非移他族何不可之有太后
宜思長策與永康王和議太后曰誰可遣者對曰太后
不疑臣臣請往萬一永康王見聽廟社之福太后乃遣
烏哲授書於帝帝遣宣徽使耶律哈斯復書辭多不遜
烏哲諫曰書意如此國家之憂未艾也能釋怨以安社

稷則臣以為莫若和好帝曰彼衆烏合安能敵我烏哲
曰即不敵奈骨肉何況未知孰勝借曰幸勝諸臣之族
孰於魯呼者無噍類矣以此計之惟和為善左右聞者
失色帝良久問曰若何而和烏哲對曰與太后相見各
紓忿恚和之不難不然決戰非晚帝然之遂遣哈斯詣
太后約和往返數日議乃定始相見怨言交讓殊無和
意太后謂烏哲曰汝當為我畫之烏哲進曰太后與大
王若能釋怨臣乃敢進說太后曰汝第言之烏哲借謁

者籌執之謂太后曰昔人皇王在何故立嗣聖太后曰
立嗣聖者太祖遺旨又曰大王何故擅立不稟尊親帝
曰人皇王當立而不立所以去之烏哲正色曰人皇王
捨父母之國而奔唐子道當如是耶大王見太后不少
遜謝惟怨是尋太后牽于偏愛託先帝遺命妄授神器
如此何敢望和當速交戰擲籌而退太后泣曰向太祖
遭諸弟亂天下荼毒瘡痍未復庸可再乎乃索籌一帝
曰父不為而子為又誰咎也亦取籌而執左右感激大

愼太后謂烏哲曰議既未定神器竟誰歸烏哲曰太后若授永康王順天合人復何疑魯呼厲聲曰我在烏雲安得立烏哲曰禮有世嫡不傳諸弟昔嗣聖之立尚以為非況公暴戾殘忍人多怨讟萬口一辭願立永康王不可奪也太后顧魯呼曰汝亦聞此言乎汝實自為之乃許立永康帝謂烏哲曰汝與朕屬尤近何反助太后烏哲對曰臣以社稷至重不可輕付故如是耳上喜其忠天祿二年耶律天德蕭翰謀反下獄特哩袞瑠格及

弟璜都結天德等為亂耶律實喇潛告烏哲烏哲遽引
入見白其事璠格等不服事遂寢未幾璠格邀駕觀樗
蒲捧觴上壽袖刃而進帝覺命執之親詰其事璠格自
誓帝復不問烏哲奏曰當使璠格與實喇對狀不可輒
恕帝曰卿為朕鞠之烏哲率劍士往訊之天德等伏罪
誅天德杖輸還璠格以璜都使哈噶斯國三年表列泰
寧王察克陰謀事上不聽五年為右皮室詳袞秋上祭
讓國皇帝于行宮與羣臣皆醉察克弒帝烏哲聞有言

衣紫者不可失乃易衣而出亟遣人召諸王及喻禁衛
長皮室等同力討賊時壽安王歸帳烏哲遣弟冲迎之
王意尚猶豫烏哲曰大王嗣聖子賊若得之必不容羣
臣將誰事社稷將誰賴萬一落賊手悔將何及王始悟
諸將聞烏哲出相繼而至遲明整兵出賊不意圍之遂
誅察克亂既平穆宗即位謂烏哲曰朕之性命實出卿
手命知國事以逆黨財產盡賜之烏哲固辭應歷五年
為北院大王總山西事保寧初宋圍太原以烏哲率兵

往援至白馬嶺遣勁卒夜出間道疾馳駐太原西鳴鼓
舉火宋兵以為大軍至懼而宵遁以功加裕悅四年漢
劉繼元遣使來貢致幣於烏哲烏哲以聞帝命受之五
年五月薨年五十七帝痛悼輟朝三日後道宗詔上京
立祠祭享樹碑以紀其功云

耶律吼字赫魯六院部額爾奇木博果濟之後端慤好
施不事生產太宗頗倚任會同六年為南院大王涖事
精簡人不敢以年少易之時晉主石重貴表不稱臣辭

多倨慢吼言晉罪不可不伐及帝親征以所部兵從既入汴諸將皆取內帑珍異吼獨取馬鎧帝嘉之及帝崩于樂城無遺詔軍中憂懼不知所為吼詣北院大王耶律斡議曰天位不可一日曠若請于太后則必屬魯呼魯呼暴戾殘忍詎能子民必欲厭人望則當立永康王斡然之會耶律安圖來意與吼合遂定議立永康王為世宗頃之以功加採訪使賜以寶貨吼辭曰臣位已高敢復求富臣從弟達魯諸子坐事籍沒陛下哀而出

之則臣受賜多矣上曰吼舍重賞以族人為請其賢遠甚許之仍賜宮戶五十時有取當世名流作七賢傳者吼與其一天祿三年卒年三十九子和勒博

和勒博字實訥嘗與耶律烏哲平察克亂穆宗以其父吼首議立世宗故不顯用晚年為本族敵史及景宗即位以平察克功授昭德軍節度使為北院大王時黃龍府軍將燕頗殺守臣以叛和勒博討之破於鴨綠江坐不親追擊以至失賊杖之乾亨間卒

耶律安圖曾祖揚珠玄祖之長子祖春博里為本部額爾奇木父迪里幼多疾時太祖為塔瑪噶賽特常加撫育神冊六年為特哩袞從太祖將龍軍討準布黨項有功天贊三年為南院額爾奇木征渤海攻輝罕城俘斬甚衆太祖崩淳欽皇后稱制欲以大元帥嗣位迪里建言帝位宜先嫡長東丹王當立由是忤旨以黨附東丹王詔下獄訊鞠加以炮烙不伏殺之籍其家安圖自幼若成人居父喪哀毀過禮見者傷之太宗屢加慰諭嘗

曰此兒必為令器既長寡言笑重然諾動遵繩矩事母至孝以父死非罪未葬不預宴樂世宗在藩邸尤加憐恤安圖密自結納太宗伐晉還至樂城崩諸將欲立世宗以魯呼及壽安王在朝猶豫未決時安圖直宿衛世宗密召問計安圖曰大王聰安寬恕人皇王之嫡長先帝雖有壽安天下屬意多在大王今若不斷後悔無及會有自京師來者安圖詐以魯呼死傳報軍中皆以為信於是安圖詣北南二大王計之北院大王幹聞而遽

起曰吾二人方議此事先帝嘗欲以永康王為儲貳今日之事有我輩在孰敢不從但恐不白太后而立為國家啟釁安圖對曰大王既知先帝欲以永康王為儲副況永康王賢明人心樂附今天下甫定稍緩則大事去矣若白太后必立魯呼且魯呼殘暴行路共知果嗣位如社稷何南院大王吼曰此言是也吾計決矣乃整軍召諸將奉世宗即位于太宗柩前帝立以安圖為腹心總知宿衛是歲約和于潢河橫渡太后問安圖曰吾與

汝有何隙安圖以父死為對太后默然及置北院樞密使上命安圖為之賜奴婢百口寵任無比事皆取決焉然性太寬事循苟簡豪猾縱恣不能制天祿未察克兵犯御幄又不能討由是中外短之穆宗即位以立世宗之故不復委用應歷三年或誣安圖與齊王雅斯哈謀亂繫獄死姪索吉左皮室詳袞

耶律幹字達年隋國王實魯孫南院額爾奇木烏蘇子少簡重有器識太祖時雖未官而常任以事太宗即位

乃為特哩袞天顯末帝援河東幹為先鋒敗張敬達軍
於太原北會同中遷北院大王及伐晉復為先鋒與梁
漢璋戰於瀛州敗之太宗崩于樂城南方州郡多叛士
馬困乏軍中不知所為幹與耶律吼定策立世宗乃令
諸將曰大行上賓神器無主永康王人皇王之嫡長天
人所屬當立有不從者以軍法從事諸將皆曰諾世宗
即位賜官戶五十拜裕悅卒年五十四

耶律托雲字托紐孟父楚國王之後父摩綽為額爾奇

木托雲性端直會同中領九錫林部政濟寬猛世宗即位為特哩袞天祿三年兼政事令封漆水郡王穆宗立以匡贊功嘗許以本部大王後將葬世宗托雲懇言於帝曰臣蒙先帝厚恩未能報幸及大葬臣請陪位帝由是不悅寢其議薨

耶律塔拉字尼嚕古六院部郎君尼古察之後沉厚多智有任重才年四十未仕會同間為邊部令公應歷初陞南院大王均賦役勸耕稼部人化之戶口豐殖時周

人侵漢以塔拉都統西南道軍援之周已下太原數城
漢人不敢戰及聞塔拉兵至周主遣郭從義尚鈞等率
精騎拒於忻口塔拉擊敗之獲其將史彥超周軍遁歸
復所陷城邑漢主詣塔拉謝及漢主殂宋師來伐上命
塔拉為行軍都統發諸道兵救之既出鴈門宋謀知而
退保寧元年加兼政事令致政乾亨初召之上見鬚髮
皓然精力猶健問以政事厚禮之以疾薨年七十九塔
拉凡用兵賞罰信明得士卒心河東單弱不為周宋所

併者塔拉有力焉在治所不修邊幅百姓無稱年穀屢稔時耶律烏哲居北院塔拉居南院俱有政迹朝議以為富民大王云

贊曰立嗣以嫡禮也太宗崩非安圖吼幹謀而克斷策立世宗非烏哲直而能諫杜太后之私折魯呼之暴以成橫渡之約則亂將誰定四臣者庶幾春秋首止之功哉

遼史卷七十七

遼史卷七十七考證

耶律烏哲傳五年五月薨 五年原本作是年考景宗
紀保寧五年五月裕悅烏哲薨今據改

耶律吼傳臣從弟達魯諸子坐事籍沒 達魯原本作
的祿世宗紀又作的魯今併改

耶律安圖傳曾祖揚珠元祖之長子 揚珠原本作巖
本皇族表作巖術皇子表作巖本皆傳寫之訛今併
改又皇子表元祖長子曰瑪魯揚珠其第二子也與

傳亦互異

父迪里神冊六年為特哩袞從太祖將龍軍討準布
項有功天贊三年為南院額爾奇木征渤海 按太
祖紀神冊六年迪里為特哩袞天贊三年五月為南
院額爾奇木九月從太祖討準布略地西南天顯元
年正月從征渤海是年太祖崩十一月迪里被殺前
後序次秩然今傳以迪里從討準布屬之神冊六年
而從征渤海又不繫以天顯元年殊屬疎畧

耶律塔喇傳周主遣郭從義尚鈞等率精騎拒於忻口
按五代歐史周本紀漢世家俱作符彥卿穆宗紀
及契丹國志正同通鑑又作李筠張永德亦無郭從
義尚鈞之名皆傳聞異詞也

遼史卷七十七考證

欽定四庫全書

遼史卷七十八

元中書右丞相總裁托克托等修

列傳第八

耶律伊勒哈

蕭哈里

蕭和斯

蕭思溫

蕭繼先

耶律伊勒哈字蘇色本宮分人檢校太師赫魯之子應

歷初以父任入侍數歲始為殿前都點檢時上新即位
疑諸王有異志引伊勒哈為布衣交一切機密事必與
之謀遷寄班都知賜宮戶時上酤酒數以細故殺人有
監雉者因傷雉而亡獲之欲誅伊勒哈諫曰是罪不應
死帝竟殺之以屍付伊勒哈曰收汝故人伊勒哈終不
為止復有監鹿詳衮亡一鹿下獄當死伊勒哈又諫曰
人命至重豈可為一獸殺之良久得免遼法廢岐角者
惟天子得射會秋獵善為鹿鳴者呼一鹿至命伊勒哈

射應弦而踣上大悅賜金銀各百兩名馬百匹及黑山東穆辰之地後穆宗被弑坐守衛不嚴被誅

蕭哈里字伊德森其先約尼氏時本部額爾奇木父塔喇天顯間為本部令公哈里貌魁偉膂力過人天祿間

娶明王安圖女阿雅翁主應歷初察克亂阿雅連坐繼

娶綽哈公主上以近戚嘉其勤篤命預北府宰相選頃之總知軍國事時諸王多坐反逆哈里為人廉謹達政體每被命案獄多得其情人無冤者繇是知名漢主劉

承鈞每遣使入貢必別致幣物詔許受之年五十卒帝
愍悼輟朝二日

蕭和斯字延寧世為北院吏累遷御史中丞總典羣牧
部籍應厯初遷左客省使未幾拜御史大夫時諸王多
坐事繫獄上和斯有才幹詔窮治稱旨改北院樞密
使仍命世預宰相選和斯辭曰臣子孫賢否未知得一
客省使足矣從之上晚歲醺酒用刑多溫 and 斯居要地
蹢躅自保未嘗一言匡救議者以是少之年五十七卒

蕭思溫小字伊庫宰相達魯之族弟哈瑪爾之子通書
史太宗時為奚圖哩太尉尚燕國公主為羣牧都林牙
思溫在軍中握齟修邊幅僚佐皆言非將帥才尋為南
京留守初周人攻揚州上遣思溫躡其後憚暑不敢進
拔緣邊數城而還後周師來侵圍馮毋鎮勢甚張思溫
請益兵帝報曰敵來則與統軍司併兵拒之敵去則務
農作勿勞士馬會敵入東城我軍退渡濠沱而屯思溫
勒兵徐行周軍數日不動思溫與諸將議曰敵衆而銳

戰不利則有後患不如頓兵以老其師躡而擊之可以
必勝諸將從之遂與統軍司兵會師他說請濟師周人
引退思溫亦還已而周主復北侵與其將傅元卿李崇
進等分道竝進圍瀛州陷益津瓦橋淤口三關垂迫固
安思溫不知計所出但云車駕旦夕至麾下士奮躍請
戰不從已而陷易瀛莫等州京齊人皆震駭往往遁入
西山思溫以邊防失利恐朝廷罪已表請親征會周主
榮以病歸思溫退至益津偽言不知所在遇步卒二千

餘人來拒敗之是年聞周喪燕民始安乃班師時穆宗
酒嗜殺思溫以密戚預政無所匡輔士論不與十九
年春蒐上射熊而中思溫與伊勒希巴伊勒希等進酒
上壽帝醉還宮是夜為庖人錫袞等所弑思溫與南院
樞密使高勲飛龍使紐哩等立景宗保寧初為北院樞
密使兼北府宰相仍命世預其選上冊思溫女為后加
尚書令封魏王從帝獵閭山為賊所害

蕭繼先字楊隱小字瑠智格幼穎悟叔思溫命為子膚

智皇后尤愛之乾亨初尚齊國公主拜駙馬都尉統和
四年宋人來侵繼先率邏騎逆境上多所俘獲上嘉之
拜北府宰相自是出師繼先必將本府兵先從拔狼山
石壘從破宋軍應州上南征取通利軍戰稱捷力及親
征高麗以繼先年老留守上京卒年五十八繼先雖處
富貴尚儉素所至以善治稱故將兵攻戰未嘗失利名
重戚里

論曰嗚呼人君之過莫大於殺無辜湯之伐桀也數其

罪曰竝告無辜於上下神祇武王之伐紂也數其罪曰
無辜籲天堯之伐苗民也呂侯追數其罪曰殺戮無辜
迹是言之伊勒哈之諫廩廩庶幾古君子之風矣雖然
善諫者不諫於已然蓋必先得於心術之微而察脉者
先其病而治之則易為功穆宗沈湎失德蓋其資富彊
之勢以自肆久矣使羣臣於造次動作之際此諫彼諍
提而警之以防其甚則亦詎至是哉予以知和斯思溫
處位優重耽祿取容真鄙夫矣若哈里之折獄繼先之

善治可謂任職臣歟

遼史卷七十八

遼史卷七十八考證

蕭哈里傳繼尚綽哈公主

按公主表綽果係太宗女

原本訛翁主今改

蕭思溫傳會敵入東城

按穆宗紀應歷八年周陷東

城縣宋史東城縣隸河間府傳謂東城疑即東城之

訛本史地理志不載姑仍其舊

蕭思溫傳周將李崇進等分道並進

按李崇進通鑑

作重進

蕭思溫傳庖人錫衮 按錫衮原文辛古此又作斯奴

古今併改

蕭思溫傳為賊所害 按高勲及紐哩傳盜殺思溫實係二人之謀景宗時追封思溫楚國王傳俱不載

蕭繼先傳 按蕭繼先聖宗本紀俱作蕭繼遠事跡與本傳俱同外戚傳公主表及本傳俱作繼先蓋繼先實嗣思溫為後或曾更名故紀載互異

遼史卷七十八考證